

Pusat tidak sisih Sarawak

UM - 11/2/2007

MIRI 10 Feb. — Kerajaan Pusat tidak menyisihkan Sarawak daripada arus pembangunan nasional walaupun sukar untuk membangunkan keseluruhan negeri itu seperti di Semenanjung, kata Perdana Menteri Datuk Seri Abdullah Ahmad Badawai.

Menurutnya, Kerajaan Pusat mengamalkan pendekatan seimbang dalam pembangunan negara dan sentiasa berusaha memperbaiki kelemahan atau kekurangan kemajuan yang dicapai di mana-mana tempat sekalipun.

“Mana-mana kawasan yang kurang membangun, kita akan berusaha meningkatkannya. Mana-mana pembangunan yang kurang berkualiti, kita akan tingkatkan kualitinya.

“Ia merupakan cara kerajaan melaksanakan dasar pembangunan seimbang kepada rakyat,” katanya pada perasmian Persidangan Agung Parti Pesaka Bumiputera Bersatu (PBB) Sarawak di sini hari ini.

Hadir sama Presiden PBB yang juga Ketua Menteri Sarawak, Tan Sri Abdul Taib Mahmud dan pemimpin parti-parti kom-

ponen Barisan Nasional (BN) Sarawak.

Abdullah turut melahirkan rasa kagum terhadap kemajuan dicapai Sarawak yang bergantung sepenuhnya kepada keupayaan sendiri berbanding negeri-negeri di Semenanjung.

Perdana Menteri berkata, kemajuan yang dicapai Semenanjung banyak dibantu oleh perancangan agensi-agensi kerajaan.

Mencabar

“Tetapi di Sarawak, kerajaan negeri memikul beban sepenuhnya dalam memajukan keseluruhan negeri dan ia merupakan tugas cukup mencabar kerana keadaan geografi dan keluasan negeri ini,” katanya.

Abdullah turut yakin Sarawak akan lebih maju menerusi usaha kerajaan negeri mewujudkan wilayah pembangunan koridor di bahagian tengah negeri seperti pembangunan wilayah selatan di Johor.

Katanya, wilayah pembangunan koridor tengah di Sarawak yang kaya dengan gas dan petroleum serta batu arang akan me-

rancakkan lagi pembangunan di kawasan lain di utara Sarawak.

“Limpahan kemajuan wilayah koridor tengah (di Sarawak) secara tidak langsung akan memberi kesan kepada pembangunan bandar lain di Sarawak seperti Miri, Bintulu dan Sibul,” katanya.

Dalam pada itu, Abdullah turut mengucapkan tahniah kepada PBB yang mengekalkan kemenangan 100 peratus pada pilihan raya negeri Mei lalu.

Menurut Perdana Menteri, walaupun ada parti komponen BN mengalami kekalahan pada pilihan raya itu berikutan masalah dalaman, ia tidak seharusnya menjejaskan kekukuhan BN di Sarawak.

“Harapan saya supaya segala masalah yang berlaku dalam parti komponen dapat diselesaikan dengan cepat.

“Jika masalah itu dibiarkan, ia akan menjadi lebih besar. Sudah menjadi tradisi kita menjalankan bedah siasat setelah selesai pilihan raya dan segera memperbaiki segala kelemahan yang dikenal pasti,” ujarnya.